

SA FESTA DE S'ARÀNGIU: SU MOMENTU DE S'IDENTIDADI

S'apuntamentu prus nodiu de su beranu sarrabesu est, sena de duda peruna, sa Festa de s'Aràngiu. Unu momentu po amostai non scéti s'aràngiu ma totus is prodotus sarrabesus. Unu momentu profetosu finas po torrai a bogai a pillu s'identidadi nosta, de is nannais nostus, figurendidedda me in is tracas. Cuncordai una traca est unu trabballu longu, diis e diis aprontendi materialis e ainas po torrai a pesai scenas de sa vida fitiana, trabballus, logus, sentidus. Est unu processu de ricostruzioni chi non si podit fai sena de incuru e atenzioni, ma tocat atèndiu cun scientificidadi antropològica, stòrica e finas linguistica. Est sa lingua sarda sa protagonista berdadera de is tracas de sa Festa de s'Aràngiu, assumancu aici iat a depi essi, seus nosu ca ddi depeus torrai su valori chi tenit cumentu a lingua natzionali nosta. Su sardu non depit essi un'aina po fai folklore, po pintai de esotismu su passau nostu, ma depit serbiri a contai echini seus, a espressai s'identidadi nosta. Cumentu si podit fai una cosa de aici? Cumentzendi a si ponni su problema chi siaus scriendi beni su sardu! Giai cumentzendi dae su fueddu chi totus scriint "tracca", non si scriit de aici, ma si scriit "traca"! Poita? Poita in sardu si podint scriri dòpias scéti L N S R D M B, totus is àteras non serbit a ddas scriri dòpias poita sonant sèmpiri dòpias, si rispàrmiat aici no? Custa e àteras arrègulas funt difinias in su Repertòriu Grafemàticu po sa Certificazioni de sa Connoscèntzia de sa Lìngua Sarda - livellu C1 de su QCER, cuncordau dae is espertus de sa RAS e de s'Universidadi de Casteddu. Su sardu non est una l'ingua de sèrie B, ma tenit is arrègulas suas! Chi non si boleis faddiri cuntatai a s'Ufitziu Lìngua Sarda de su Sàrrabus a su 3892654311, finas in whatsapp, o mandai una mail a uls.sarrabus@gmail.com, s'operatori nostu Danilo bos at a agiudai gratuitamenti po scriri beni in sardu. Innoi asuta si lassaus unu fueddàriu cun is grafias justas de is fueddus chi podint serbiri de prus po sa Festa de s'Aràngiu. Gràtzias po s'atenzioni e a si biri sanus e sardus a sa Festa de s'Aràngiu!